

## ԿԱՆՈՆՆԵՐ

### ՀԱՆՐԱՅԻՆ ԷԼԵԿՏՐՈՆԱՅԻՆ ՀԱՂՈՐԴԱԿՑՈՒԹՅԱՆ ՑԱՆՑԵՐԻ ՄԻՋԵՎ ՓՈԽԿԱՊԱԿՑՄԱՆ ԾԱՌԱՅՈՒԹՅՈՒՆՆԵՐԻ ՎԵՐՋՆԱՎՈՐՄԱՆ ՎՃԱՐՆԵՐԻ (ԴՐՈՒՅՔԱԶԱՓԵՐԻ) ՀԱՇՎԱՐԿՄԱՆ ԵՎ ԿԻՐԱՌՄԱՆ

1. Սույն կանոնները սահմանում են անհատական հանրային ամրակցված կամ շարժական կապի հեռախոսացանցերում զանգերի վերջնավորման մեծածախ շուկաներում գերիշխող դիրք զբաղեցնող օպերատորների (այսուհետ՝ Օպերատոր) հանրային էլեկտրոնային հաղորդակցության ցանցերի միջև փոխկապակցման ծառայությունների վերջնավորման վճարների (դրույքաչափերի) (այսուհետ՝ Վճարներ) հաշվարկման և կիրառման կարգը:

2. Վճարները հաշվարկվում են հիմք ընդունելով միջազգային համեմատելի ցուցանիշների տվյալները, այն է՝ Եվրոպական խորհրդարանի և Խորհրդի 2018/1972 (ԵՄ) կանոնակարգը լրացնող՝ Եվրոպական Միության ողջ տարածքում շարժական և ամրակցված ցանցերի ձայնային վերջնավորման առավելագույն վճարները սահմանող Եվրոպական Հանձնաժողովի 2020 թվականի դեկտեմբերի 18-ի պատվիրակված (ԵՄ) 2021/654 կարգավորման 4-րդ հոդվածի 1-ին, 2-րդ և 5-րդ հոդվածի 1-ին կետով սահմանված՝ շարժական և ամրակցված ձայնային վերջնավորման միասնական առավելագույն վճարները (դրույքաչափերը), և կիրառվում են հետևյալ աղյուսակով սահմանված բանաձևերով ու ժամանակացույցով՝

| Փոխկապակցման<br>ծառայության<br>տեսակը   | Առավելագույն վճարի չափը                                  |  |  |  |  |
|---|--|--|--|--|--|
|   | 01.01.2023<br>թվականից<br>մինչև<br>31.12.2023<br>թվականը | 01.01.2024<br>թվականից<br>մինչև<br>31.12.2024<br>թվականը | 01.01.2025<br>թվականից<br>մինչև<br>31.12.2025<br>թվականը | 01.01.2026<br>թվականից<br>մինչև<br>31.12.2026<br>թվականը | 01.01.2027<br>թվականից<br>մինչև<br>31.12.2027<br>թվականը |
| Հանրային<br>շարժական<br>հեռախոսացանցում<br>զանգերի<br>վերջնավորման<br>ծառայություն  | Վ = (0,7*<br>ՓՄ)/100                                     | Վ = (0,55*<br>ՓՄ)/100                                    | Վ = (0,4*<br>ՓՄ)/100                                     | Վ = (0,2*<br>ՓՄ)/100                                     | Վ = (0,2*<br>ՓՄ)/100                                     |
| Հանրային<br>ամրակցված<br>հեռախոսացանցում<br>զանգերի<br>վերջնավորման<br>ծառայություն | Վ = (0,07*<br>ՓՄ)/100                                    | Վ = (0,07*<br>ՓՄ)/100                                    | Վ = (0,07*<br>ՓՄ)/100                                    | Վ = (0,07*<br>ՓՄ)/100                                    | Վ = (0,07*<br>ՓՄ)/100                                    |

3. Սույն կանոնների 2-րդ կետի աղյուսակով սահմանված բանաձևերում Վ-ն հանրային էլեկտրոնային հաղորդակցության ցանցերում փոխկապակցման ծառայությունների վերջնավորման առավելագույն վճարն է, որը շարժական և ամրակցված կապի ցանցերի համար հաշվարկվում է առանձին և կլորացվում է մինչև հարյուրերորդական նիշ, իսկ ՓՄ-ն հաշվարկային տարվա նախորդող տարվա սեպտեմբերի 1-ին, հոկտեմբերի 1-ին և նոյեմբերի 1-ին Հայաստանի Հանրապետության կենտրոնական բանկի կողմից հրապարակված՝ 1 եվրոյի նկատմամբ հայկական դրամի՝ արժույթային շուկաներում ձևավորված միջին փոխարժեքների միջին մեծությունն է:

4. Սույն կանոնների 2-րդ կետի աղյուսակով սահմանված առավելագույն վճարից ցածր վճար կիրառելու դեպքում Օպերատորն ապահովում է դրանց ոչ խտրական (միևնույն վճար) կիրառումն իր հանրային էլեկտրոնային հաղորդակցության ամրակցված կամ շարժական կապի ցանցերի հետ փոխկապակցված հանրային էլեկտրոնային հաղորդակցության ցանցերի նկատմամբ: